



Nicolaus apud Septētrionales Germanos natus, à teneris annis pietati & literis incubuit, atq; in utrisq; præclaram operam impendit. Cum itaque prima rudimenta in patria percepisset, sese hinc inde ad Academias Germaniæ contulit, atq; in illis (Saxonicis præsertim) plurimum profecit. Deinde ad Koppenhagensem Vniuersitatem & Danorum Metropolim peruenit, atq; artiũ & linguarũ studio Theologiam magna diligentia coniunxit. Accedebat etiam morum integritas, Evangelicæ doctrinæ amor, atq; rara dicendi facundia. Id cum eius loci proceres intellexissent, eum suæ Ecclesiæ ministrum elegerũt, atq; uerbo salutis oues concreditas pascere iusserunt. id quod ipse pro sua prudentia feliciter præstitit, & rara eruditione omnibus doctis innotuit. Scripsit is etiam uarios libellos, & in primis Euangelia dominicalia cum Epistolis piè explicauit, atq; fratres symmistas per Danorum & Noruegiorum regnum ad fidei constantiam & perseuerantiam, contra uarias ingruentes passim absurdas opiniones & hæreses, adhortatus est. Hoc modo ipse in celebri illa schola etiamnum pergit, atque cæteris professoribus sua pietate & doctrina exemplo existit.

Anonymos.